

Polis gempur 12 premis judi dalam talian

Kesemua premis perjudian di Klang Utara itu dipotong bekalan elektrik

Oleh MUHAMMAD AMINURALIF
MOHD ZOKI

KLANG

Sebanyak 12 buah premis perjudian dalam talian di sekitar kawasan Klang Utara diserbu serta dipotong bekalan elektrik pada Selasa dan Rabu lalu.

Ketua Polis Daerah Klang Utara, Asisten Komisioner S Vijaya Rao berkata, serbuan dijalankan di beberapa lokasi di sekitar kawasan itu dan pemotongan bekalan elektrik dijalankan melibatkan kesemua 12 premis judi dalam talian dengan kerjasama Tenaga Nasional Berhad (TNB) Cawangan

Klang.

"Tindakan ini dilaksanakan sebagai langkah pencegahan kegiatan perjudian dalam talian yang dilihat semakin membimbangkan sejak kebelakangan ini," katanya dalam kenyataan pada Khamis.

Menurut beliau, sebelum ini polis telah melaksanakan operasi sama pada tahun 2020 dan 2021.

"Operasi dijalankan melibatkan 32 premis pada tahun 2020 dan 26 premis pada tahun 2021, kesemua premis telah diambil tindakan dan dituduh di mahkamah.

"Bagaimanapun, terdapat premis yang dikesan masih meneruskan operasi biarpun tindakan diambil sebelum ini," katanya.

Beliau turut mengingatkan pemilik premis supaya tidak sewenangnyanya menyewakan premis mereka kepada sindiket perjudian dalam talian itu dan tindakan tegas akan diambil sekiranya premis milik mereka dijadikan sarang kegiatan perjudian.



Antara premis yang dipercayai menjalankan kegiatan perjudian dalam talian digempur polis dengan kerjasama Tenaga Nasional Berhad Cawangan Klang dalam operasi di sekitar Klang Utara pada Selasa dan Rabu.